

SAMÞYKKT

um hunda- og kattahald og annað gæludýrahald í Fjarðabyggð.

I. KAFLI

Almennt.

1. gr.

Gildissvið.

Samþykkt þessi gildir um dýrahald hunda, katta og annarra gæludýra í Fjarðabyggð sem er á starfssvæði heilbrigðisnefndar Austurlandssvæðis og sætir þeim takmörkunum sem getið er í samþykkt þessari. Þéttbýli sem um ræðir í samþykkt þessari eru Neskaupstaður, Reyðarfjörður, Eskifjörður, Fáskrúðsfjörður, Stöðvarfjörður og Breiðdalur.

2. gr.

Stjórnýsla.

Heilbrigðisnefnd Austurlandssvæðis fer með málefni gæludýrahalds samkvæmt lögum nr. 7/1998, um hollustuhætti og mengunarvarnir, og hefur eftirlit með framkvæmd samþykktar þessarar. Sveitarfélagið fer með framkvæmd samþykktarinnar eins og nánar greinir í umboði heilbrigðisnefndar. Sveitarfélagið skal ráða sérstaka aðila til að sinna dýraeftirliti eða fela starfsmönnum sveitarfélagsins það hlutverk.

Dýraeftirlit Fjarðabyggðar getur leitað aðstoðar heilbrigðisnefndar, Matvælastofnunar og lög-reglufyrivalda, ef og þegar þörf krefur, t.d. ef hundur, köttur eða annað gæludýr er að mati eftirlitsins hættulegt umhverfi sínu, vörsluaðili dýrsins tálmar starfi eftirlitsaðila samkvæmt samþykkt þessari eða þegar nauðsynlegt er vegna almannahagsmuna, dýravelferðar eða heilbrigðis- og öryggissjónarmiða, að leita atbeina lögreglu við að fjarlægja dýr.

3. gr.

Dýravelferð og dýravernd.

Um almennan aðbúnað og velferð gæludýra sem og um ræktun, verslun, geymslu og leigu hunda, katta eða annarra gæludýra í atvinnuskyni gilda ákvæði laga nr. 55/2013, um velferð dýra og reglugerð nr. 80/2016, um velferð gæludýra.

Samkvæmt lögum nr. 55/2013, um velferð dýra, fer Matvælastofnun með eftirlit og framkvæmd þeirra laga.

II. KAFLI

Hundahald.

4. gr.

Leyfis skylda hunda.

Allir hundar eru leyfis skyldir og skal skrá þá á nafn og lögheimili lögráða umráðamanns í sveitarfélaginu. Viðkomandi einstaklingur er skráður umráðamaður hundsins og skal hundurinn haldinn á heimili hans. Útgefið leyfi er óframseljanlegt. Að jafnaði er ekki veitt leyfi fyrir fleiri en tvo hunda á hvert heimili. Sé óskað eftir leyfi til að vera með fleiri en tvo hunda á heimili skal fylgja rökstuðningur svo sem um ástæður, aðbúnað og færni umráðamanns til frekara hundahalds.

Skyll er að sækja um leyfi fyrir hundi til sveitarfélagsins, innan tveggja vikna frá því að hundur er tekinn inn á heimili. Sækja skal um leyfi fyrir hvolpum eigi síðar en þegar þeir ná þriggja mánaða aldri. Hundar sem sótt er um leyfi fyrir skulu örmerktir af dýralækni samkvæmt reglugerð nr. 80/2016 um velferð gæludýra, og skal númer merkis skráð við leyfisveitingu.

Dveljist hundur tímabundið í sveitarfélaginu skal skrá hann hjá sveitarfélaginu, en slík skráning skal þó ekki gilda lengur en í þrjá mánuði. Skráning skal fara fram sem fyrst og ekki seinna en innan tveggja vikna frá því að hundur kom inn í sveitarfélagið. Um gestkomandi hunda sem skráðir eru tímabundið sem og óskráða hunda gilda öll ákvæði þessarar samþykktar.

Við leyfisveitingu getur sveitarfélagið leitað umsagnar lögreglu, Matvælastofnunar og annarra stjórnvalda, telji það ástæðu til.

5. gr.

Gögn sem þarf að framvísa við umsókn um leyfi.

Umsókn um leyfi til hundahalds skal berast í gegnum íbúagátt Fjarðabyggðar á heimasíðu sveitarfélagsins og skulu eftirfarandi gögn lögð fram við umsókn um leyfi:

1. Upplýsingar um heiti, fæðingardag, kyn, tegund og önnur einkenni hunds.
2. Vottorð frá dýralækni um einstaklingsmerkingu hunds, sbr. 1. mgr. 22. gr. laga nr. 55/2013, um velferð dýra og 11. gr. reglugerðar nr. 80/2016, um velferð gæludýra.
3. Vottorð frá dýralækni um ormahreinsun hundsins, sbr. 57. gr. reglugerðar nr. 941/2002, um hollustuhætti.

Þegar sótt er um leyfi til að halda hund í fjöleignarhúsi gilda ákvæði laga nr. 26/1994, um fjöleignarhús.

Skilyrði fyrir leyfi til hundahalds er að gögn skv. 1. mgr. hafi verið lögð fram af hálfu umsækjanda og leyfisgjald greitt samkvæmt gjaldskrá sveitarfélagsins.

Umráðamaður hunds skal tilkynna sveitarfélaginu skriflega innan mánaðar um aðsetursskipti eða dauða hunds.

Óheimilt er að halda hund í húsnæði þar sem enginn er búsettur.

Bæjarstjórn getur ákveðið að óheimilt sé að halda hund í húsnæði sem sveitarfélagið á.

Sveitarfélaginu er heimilt að hafna beiðni um veitingu leyfis ef umsækjandi hefur áður eða ítrekað gerst brotlegur við samþykkt um hundahald í sveitarfélaginu eða annars staðar.

6. gr.

Bannaðar hundategundir.

Bannað er að halda hunda af þeim tegundum sem Matvælastofnun hefur bannað innflutning á, sbr. reglugerð nr. 935/2004, um innflutning gæludýra og hundasæðis, með síðari breytingum.

7. gr.

Skyldur umráðamanna hunda.

Skráðum umráðamanni hunds ber að sjá til þess að umhirða hundsins sé í samræmi við ákvæði laga nr. 55/2013, um velferð dýra.

Umráðamenn skulu færa hunda sína árlega til ormahreinsunar hjá dýralækni og afhenda sveitarfélaginu staðfestingu á að ormahreinsun hafi farið fram, sé þess þörf. Sveitarfélagið upplýsir um hvenær árleg ormahreinsun fer fram og er umráðamönnum skylt að mæta á tilsettum tímum með hunda sína. Ef umráðamaður getur af einhverjum ástæðum ekki mætt með hund sinn á tilsettum tíma skal hann afhenda sveitarfélaginu staðfestingu frá dýralækni um að ormahreinsun hafi farið fram.

Umráðamönnum hunda er skylt að ábyrgðartryggja sig gegn tjóni sem hundar þeirra kunna að valda mönnum, dýrum, gróðri og munum og skulu árlega framvísa til sveitarfélags staðfestingu frá viðurkenndu tryggingafélagi þar um, sé sveitarfélagið ekki með hópryggingu innifalda í leyfisgjaldi.

Umráðamenn hunda skulu árlega greiða leyfisgjald fyrir hunda sína samkvæmt gjaldskrá sem sveitarfélagið setur í samræmi við ákvæði 59. gr. laga nr. 7/1998, um hollustuhætti og mengunarvarnir.

Ekki skal skilja hund eftir einan og eftirlitslausan að jafnaði lengur en átta klukkustundir í senn nema í undantekningartilvikum. Aðeins er heimilt að tjóðra hunda utandyra í undantekningartilvikum og þá einungis undir eftirliti í stuttan tíma í senn, sbr. reglugerð nr. 80/2016, um velferð gæludýra. Þegar hundur er í festi á lóð skal lengd festarinnar við það miðuð að þeir sem eiga réttmætt erindi inn á lóðina geti óhindrað farið um lóðina.

Hundar skulu ávallt bera ól með plötu um hálsinn með ágreypu leyfisnúmeri og símanúmeri umráðamanns.

Hundur skal aldrei ganga laus utan svæða sem eru þar til ætluð, heldur vera í taumi í fylgd með aðila sem hefur fullt vald yfir honum eða vera í tryggu gerði innan lóðar. Ef hundur sleppur skulu umráðamenn þegar gera ráðstafanir til að handsama hann.

Utan þéttbýlis er heimilt að sleppa hundi lausum undir eftirliti umráðamanns, án þess þó að gengið sé á rétt viðkomandi landeiganda. Sé hundur laus ber umráðamanni að tryggja að hann valdi ekki öðrum ónæði, skapi hættu eða óöryggi og hlýði innkalli. Lausir hundar mega þó ekki vera á skíða-svæðum þegar þau eru notuð sem slík.

Hundar á lögbýlum mega ganga frjálssir á landareign umráðamanna sinna. Að öðru leyti skulu þeir hundar háðir ákvæðum samþykktar þessarar.

Umráðamanni hunds er ávallt skylt að fjarlægja saur eftir hundinn.

Umráðamanni hunds er skylt að sjá til þess að hundur hans valdi ekki hættu, óþægindum, óþrifnaði, óöryggi eða verði mönnum til óþæginda á annan hátt, t.d. með stöðugu eða ítrekuðu gelti eða ýlfri.

Ef hundur veldur nágrönnum eða öðrum ítrekuðu ónæði, óþrifum eða tjóni, þá ber umráðamanni hundsins að leita leiða til að koma í veg fyrir slíkt.

Hafi umráðamaður hunds vitneskju um eða ástæðu til að ætla að hundurinn sé grimmur eða varasamur skal hann ávallt hafa hundinn mýldan utan heimilis.

Óheimilt er að koma með hunda, þó í taumi séu, í opinberar stofnanir, vatnsveitur, að vatnsbólum og verndarsvæðum þeirra, sbr. reglugerð nr. 536/2001 um neysluvatn, brunnum og sjóveitum, eða þá staði sem um getur í 1. mgr. 19. gr., sbr. fylgiskjal 3 í reglugerð nr. 941/2002 um hollustuhætti, nema í tilvikum þar sem heilbrigðisnefnd hefur heimilað, sbr. 1. mgr. 19. gr. reglugerðarinnar. Heimilt er þó að fara með dýr inn í íþróttamannvirki, heilbrigðisstofnanir, snyrtistofur og aðra starfsemi sem sérstaklega er ætluð dýrum. Einnig eru hundar heimilaðir í strætó og á þeim veitingastöðum sem við á, sbr. ákvæði sömu greinar.

Óheimilt er að hleypa hundum inn í húsnæði matvælafyrirtækja, sbr. reglugerð nr. 103/2010 um gildistöku reglugerðar Evrópuþingsins og ráðsins (EB) nr. 852/2004 um hollustuhætti sem varða matvæli og reglugerð nr. 405/2004 um náttúrulegt ölkelduvatn og átappað lindarvatn.

Óheimilt er að fara með hunda á almennar útisamkomur, brennur eða flugeldasýningar.

Umráðamanni hunds ber að hlíta lögum og reglum sem varða hundahald sem og fyrirmælum sem heilbrigðisnefnd setur.

8. gr.

Lausaganga hunda.

Hunda sem ganga lausir á almannafæri er heimilt að handsama og færa í dýrageymslu á vegum sveitarfélagsins. Lesið skal af einstaklingsmerkjum og þegar gerðar ráðstafanir til að hafa uppi á umráðamönnum hundanna.

Sé ekki leyfi fyrir hundinum í sveitarfélaginu er óheimilt að afhenda hann fyrr en hann hefur fengið leyfi í samræmi við 5. gr. Að fengnu leyfi og gegn framvísun á staðfestingu greiðslu leyfis- og handsömunargjalds auk annars áfallins kostnaðar vegna brotsins, sbr. gjaldskrá sveitarfélagsins, getur umráðamaður hundsins fengið hann afhentan.

Sé hundur með leyfi handsamaður skal strax tilkynna umráðamanni það og upplýsa hann um hvað vanræksla á að vitja hundsins getur haft í för með sér. Ef umráðamaður vitjar ekki dýrsins innan viku frá því að tilkynnt var um handsömun þess eða ef umráðamaður finnst ekki innan tveggja vikna er sveitarfélaginu heimilt að ráðstafa dýrinu eins og um hálfvillt dýr sé að ræða, sbr. ákvæði 24. gr. laga nr. 55/2013, um velferð dýra. Áfallinn kostnaður greiðist af skráðum umráðamanni.

Hundur sem ekki er einstaklingsmerktur í samræmi við 22. gr. laga nr. 55/2013, um velferð dýra, telst vera hálfvillt dýr. Komi til handsömunar á slíkum hundi er sveitarfélaginu heimilt að ráðstafa honum til nýs eiganda, selja hann gegn áföllnum kostnaði eða aflífa án bóta, þegar liðnir eru sjö sólarhringar frá handsömun.

Sé hundur handsamaður sem hefur ekki leyfi í sveitarfélaginu er óheimilt að afhenda hann fyrr en búið er að greiða handsömunargjald auk annars áfallins kostnaðar, sbr. gjaldskrá sveitarfélagsins. Sækja skal um leyfi fyrir hundi skv. 3. mgr. 4. gr. ef hann dvelur lengur en tvær vikur í sveitarfélaginu.

9. gr.

Grimmir, varasamir og hættulegir hundar. Aflífun.

Hafi hundur bitið mann, skepnu eða gæludýr sem og ef hundur telst hættulegur, geta eftirtaldir aðilar, tjónþoli, heilbrigðisnefnd, dýraeftirlitið eða umráðamaður hunds krafist þess að hundurinn verði aflífaður eða honum fundin önnur úrræði.

Samþykki skráður umráðamaður hunds ekki aflífun né að honum séu fundin önnur úrræði skal heilbrigðisnefnd taka ákvörðun um hvort fallist verði á kröfuna. Óski hundaeigandi þess getur hann

lagt fram álit sérfróðs aðila, dýralæknis eða hundapjálfara sem heilbrigðisnefnd viðurkennir, áður en ákvörðun um afdrif hunds er tekin. Meðan mál hunds er í skoðun er umráðamanni skylt að hafa hundinn í samþykktri dýrageymslu. Umráðamaður getur þó sótt um til heilbrigðisnefndar að fá að hafa hundinn á heimili sínu meðan málið er í skoðun gegn skuldbindingu um að hafa hundinn ávallt mýldan þegar hann er utandyra.

Allur kostnaður vegna skapgerðarmats og vistunar hunds skal greiddur af umráðamanni.

III. KAFLI

Kattahald.

10. gr.

Leyfisskylda katta.

Allir kettir í þéttbýli eru leyfisskyldir.

Kattahald í dreifbýli sætir að öllu jöfnu ekki takmörkunum.

Skylt er að sækja um leyfi til kattahalds í þéttbýli hjá sveitarfélaginu þar sem umráðamaður hefur lögheimili, innan tveggja vikna frá því að köttur er tekinn inn á heimili. Sækja skal um leyfi fyrir kettlingum eigi síðar en þegar þeir ná þriggja mánaða aldri.

Kettir sem sótt er um leyfi fyrir skulu örmerktir af dýralækni samkvæmt reglugerð nr. 80/2016, um velferð gæludýra, og skal númer merkis skráð við leyfisveitingu.

Ketti skal skrá á nafn og heimili lögráða umráðamanns sem hefur lögheimili í sveitarfélaginu og skal kötturinn haldinn á heimili hans. Útgefið leyfi er óframseljanlegt. Að jafnaði er ekki veitt leyfi fyrir fleiri en tvo ketti á hvert heimili. Sé óskað eftir leyfi, til að vera með fleiri en tvo ketti á heimili, skal fylgja rökstuðningur svo sem um ástæður, aðbúnað og færni umsjónaraðila til frekara kattahalds.

Við leyfisveitingu getur sveitarfélagið leitað umsagnar lögreglu, Matvælastofnunar og annarra stjórnvalda telji það ástæðu til.

11. gr.

Gögn sem þarf að framvísa við umsókn um leyfi.

Umsókn um leyfi til kattahalds skal berast í gegnum íbúagátt Fjarðabyggðar á heimasíðu sveitarfélagsins og skulu eftirfarandi gögn lögð fram við umsókn um leyfi:

1. Upplýsingar um heiti, fæðingardag, kyn, tegund og önnur einkenni kattar.
2. Vottorð frá dýralækni um einstaklingsmerkingu kattar, sbr. 1. mgr. 22. gr. laga nr. 55/2013, um velferð dýra og 11. gr. reglugerðar nr. 80/2016, um velferð gæludýra.
3. Vottorð frá dýralækni um ormahreinsun kattarins, sbr. 58. gr. reglugerðar nr. 941/2002, um hollustuhætti. Þegar sótt er um leyfi til að halda ketti í fjöleignarhúsi gilda ákvæði laga nr. 26/1994, um fjöleignarhús.

Skilyrði fyrir veitingu leyfis er að gögn skv. 1. mgr. hafi verið lögð fram af hálfu umsækjanda og leyfisgjald greitt samkvæmt gjaldskrá sveitarfélagsins.

Umráðamaður kattar skal tilkynna sveitarfélaginu skriflega innan mánaðar um aðsetursskipti eða dauða kattar.

Bæjarstjórn getur ákveðið að óheimilt sé að halda ketti í húsnæði sem sveitarfélagið á.

Bæjarstjórn er heimilt að hafna beiðni um veitingu leyfis ef umsækjandi hefur áður eða ítrekað gerst brotlegur við samþykkt um kattahald í sveitarfélaginu eða annars staðar.

12. gr.

Skyldur umráðamanna katta.

Skráðum umráðamanni kattar ber að sjá til þess að umhirða kattarins sé í samræmi við ákvæði laga nr. 55/2013, um velferð dýra.

Umráðamenn katta skulu færa ketti sína árlega til ormahreinsunar hjá dýralækni og skulu afhenda dýraeftirlitinu staðfestingu um að ormahreinsun hafi farið fram. Sveitarfélagið upplýsir um hvenær árleg ormahreinsun fer fram og er umráðamönnum katta skylt að mæta á tilsettum tíma með kettina sína. Ef umráðamaður getur af einhverjum ástæðum ekki mætt með kött sinn á tilsettum tíma skal hann afhenda sveitarfélaginu staðfestingu frá dýralækni um að ormahreinsun hafi farið fram.

Umráðamönnum katta er skylt að ábyrgðartryggja sig gegn tjóni sem kettir þeirra kunna að valda mönnum, dýrum, gróðri og munum og skulu þeir árlega framvísa til sveitarfélags staðfestingu frá viðurkenndu tryggingafélagi þar um, sé sveitarfélagið ekki með hóprýggingu innifalda í leyfisgjaldi.

Umráðamenn katta skulu árlega greiða leyfisgjald fyrir ketti þeirra samkvæmt gjaldskrá sem sveitarfélagið setur í samræmi við ákvæði 59. gr. laga nr. 7/1998, um hollustuhætti og mengunarvarnir.

Auk einstaklingsmerkingar skulu kettir bera hálsól með upplýsingum um heimilisfang eiganda og símanúmer.

Umráðamönnum katta ber að sjá til þess að högnar sem ganga lausir séu geltir og að læður séu gerðar ófrjóar eða hafðar á getnaðarvarnarpillu.

Umráðamönnum katta ber, eftir því sem framast er unnt, að sjá svo um að kettir þeirra valdi ekki hávaða, ónæði, óþrifnaði eða óhollustu.

Ef köttur veldur nágrönnum eða öðrum ítrekuðu ónæði, óþrifum eða tjóni, þá ber umráðamanni kattarins að leita leiða til að koma í veg fyrir slíkt.

Umráðamenn katta eru hvattir til að koma í veg fyrir að kettir þeirra séu á flækingi utan dyra frá kl. 24.00 að nóttu til kl. 07.00 að morgni.

Umráðamönnum katta ber að taka tillit til fuglalífs á varptíma, eftir því sem tók eru á, m.a. með því að hengja bjöllur á hálsólar katta eða takmarka útveru þeirra.

Óheimilt er að hafa ketti í opinberum stofnunum, skólahúsum, matvöruverslunum, við vatnsveitur, vatnsból og verndarsvæði þeirra, sbr. reglugerð nr. 536/2001 um neysluvatn, brunna og sjóveitur eða á öðrum þeim stöðum sem tilgreindir eru í 1. mgr. 19. gr., sbr. fylgiskjal 3 í reglugerð nr. 941/2002 um hollustuhætti, nema í tilvikum þar sem heilbrigðisnefnd hefur heimilað, sbr. 1. mgr. 19. gr. reglugerðarinnar. Heimilt er þó að fara með dýr inn í íþróttamannvirki, heilbrigðisstofnanir, snyrtistofur og aðra starfsemi sem sérstaklega er ætluð dýrum. Einnig eru kettir heimilaðir í strætó og á þeim veitingastöðum sem við á, sbr. ákvæði sömu greinar.

Óheimilt er að hleypa köttum inn í húsnæði matvælafyrirtækja, sbr. reglugerð nr. 103/2010 um gildistöku reglugerðar Evrópuþingsins og ráðsins (EB) nr. 852/2004 um hollustuhætti sem varða matvæli, og inn í húsnæði vatnsveitna, sbr. reglugerð nr. 536/2001 um neysluvatn.

13. gr.

Föngun katta.

Bæjarstjórn er heimilt að láta fanga ketti í eftirfarandi tilfellum:

1. Ef köttur er ómerktur.
2. Ef ítrekað er kvartað undan ágangi katta á tilteknu svæði.
3. Ef köttur finnst innandyra í leyfisleysi, á öðrum heimilum, á tímabundnum íverustað eða í fjöleignarhúsi, þar sem skortir tilskilið samþykki annarra íbúðareigenda, sbr. 11. gr.

Kettir sem fangaðir eru skulu færðir í dýrageymslu skv. 2. mgr. 16. gr. Merktum köttum sem ekki er kvartað yfir en lenda í búrum skal þó sleppa lausum og skráðum umráðamönnum tilkynnt um handsömunina og ástæður hennar.

Ef merktir kettir eru teknir úr umferð skv. 2. og 3. tölul. 1. mgr. skal það tilkynnt skráðum umráðamönnum. Komi ítrekað til handsömunar á merktum ketti vegna ónæðis telst það vera brot á samþykkt þessari. Ef umráðamaður vitjar ekki dýrsins innan viku frá því að tilkynnt var um handsömun þess eða ef umráðamaður finnst ekki innan tveggja vikna er sveitarfélaginu heimilt að ráðstafa dýrinu eins og um hálfvillt dýr sé að ræða, sbr. ákvæði 24. gr. laga nr. 55/2013, um velferð dýra. Köttur, sem hefur verið handsamaður ítrekað, skal færður í dýrageymslu og því aðeins afhentur eiganda að öll skilyrði fyrir kattahaldi skv. 11. gr. séu uppfyllt. Kattareigandi ber allan kostnað af handsömun, vörslu og föðrun kattarins, sem og aflífun hans ef til hennar kemur samkvæmt gjaldskrá sveitarfélagsins. Köttur sem ekki er einstaklingsmerktur í samræmi við 22. gr. laga nr. 55/2013, um velferð dýra, telst vera hálfvillt dýr. Í þeim tilvikum sem hálfvilltir kettir eru handsamaðir er sveitarfélaginu heimilt að ráðstafa kettinum til nýs eiganda, selja hann gegn áföllnum kostnaði eða aflífa án bóta eftir sjö sólarhringa frá handsömun.

Eigandi ómerkts kattar sem gefur sig fram skal því aðeins fá köttinn afhentan að fengnu leyfi, greiðslu leyfisgjalds vegna hans og að uppfylltum öllum skilyrði samþykktar þessarar til kattahalds.

Skal umráðamanni við greiðslu leyfisgjalds afhent beiðni sem nýta má hjá dýralækni til greiðslu fyrir hreinsun kattarins.

14. gr.

Aðgerðir gegn hálfvilltum köttum.

Meiriháttar föngun hálfvilltra katta í þéttbýliskjörnum skal auglýsa með a.m.k. viku fyrirvara og með tilmælum um að köttum með leyfi frá sveitarfélaginu sé haldið innan dyra.

Eftir sjö sólarhringa frá handsömun er sveitarfélaginu heimilt að ráðstafa hálfvilltum ketti til nýs eiganda, selja hann gegn áföllnum kostnaði eða aflífa án bóta.

IV. KAFLI

Önnur gæludýr.

15. gr.

Gæludýr önnur en kettir og hundar.

Umráðamönnum gæludýra annarra en hunda og katta er skylt að koma í veg fyrir að dýr þeirra sleppi úr haldi. Gerist það skal þegar gera ráðstafanir til að handsama dýrið.

Umráðamenn gæludýra sem haldin eru utandyra, svo sem kanína eða annarra nagdýra, skulu sjá til þess að dýrin valdi ekki nágrönnum ama svo sem með hávaða eða óhreinindum. Skulu þeir tryggja að dýrin geti ekki nagað sig út úr búri eða aðhaldi.

Kanínur skulu einstaklingsmerktar skv. 1. mgr. 22. gr. laga nr. 55/2013, um velferð dýra. Ómerktar kanínur eru skilgreindar sem hálfvillt dýr, við handsömun er sveitarfélaginu heimilt að ráðstafa hálfvilltum kaninum til nýs eiganda, selja fyrir áföllnum kostnaði eða aflífa án bóta.

V. KAFLI

Ýmis ákvæði.

16. gr.

Skuldur sveitarfélagsins.

Í kjölfar leyfisveitingar ber sveitarfélaginu að afhenda umráðamanni hunda og katta leyfisskírteini sem staðfestingu á að dýrið hafi fengið leyfi og sé skráð til heimilis í sveitarfélaginu.

Sveitarfélagið skal tryggja að til staðar sé dýrageymsla sem hefur tilskilin leyfi skv. 24. gr. laga nr. 55/2013, um velferð dýra og reglugerð nr. 80/2016 um velferð gæludýra, til vörslu hunda og katta sem þarf að fanga vegna brota á samþykkt þessari.

17. gr.

Skuldur eftirlitsaðila.

Dýraeftirlit sveitarfélagsins skal halda og uppfæra skrá yfir hunda og ketti í sveitarfélaginu. Í skránni skulu koma fram allar upplýsingar er varða ketti og hunda sem hafa leyfi samkvæmt samþykkt þessari og sem dýraeftirlitið telur skipta máli, þ.m.t. hvenær dýr hafa verið ormahreinsuð og öll afskipti sem eftirlitið hafa haft af dýrunum og umráðamönnum þeirra.

Heilbrigðisnefnd, Matvælastofnun, lögregla og eftir atvikum starfsmenn sveitarfélagsins, skulu tilkynna dýraeftirlitinu um kvartanir eða afskipti þeirra af hundum og köttum í sveitarfélaginu.

Dýraeftirlitið leggur til við heilbrigðisnefnd og skrásetur að umráðamenn hunda og katta séu áminntir skriflega vegna brota á samþykktinni.

18. gr.

Gjaldtaka.

Bæjarstjórn er heimilt að innheimta gjöld, þ.e. leyfis- og eftirlitsgjöld í samræmi við gjaldskrá sem sveitarfélagið setur skv. 5. mgr. 59. gr. laga nr. 7/1998, um hollustuhætti og mengunarvarnir. Bæjarstjórn skal láta birta gjaldskrána í B-deild Stjórnartíðinda.

Leyfisgjald skal í fyrsta sinn greitt við fyrstu leyfisveitingu og síðan skal greiða árlega gjald fyrir liðið ár. Leyfisgjaldi er ætlað að standa undir kostnaði sveitarfélagsins við hunda- og kattahald og framkvæmd samþykktar þessarar. Í gjaldskránni skal koma fram hvað er innifalið í leyfisgjaldinu. Í

gjaldskrá skal kveðið á um handsömunar- og vörslugjald vegna handsömunar gæludýra sem tekin eru í vörslu á vegum sveitarfélagsins vegna brota á samþykkt þessari.

19. gr.

Þvingunarúrræði og afturköllun leyfa.

Um valdsvið og þvingunarúrræði fer samkvæmt ákvæðum laga nr. 7/1998, um hollustuhætti og mengunarvarnir.

Bæjarstjórn er heimilt að afturkalla hunda- og kattaleyfi ef vanhöld verða á ormahreinsun, greiðslu leyfisgjalds sem og ef skráður umráðamaður hefur brotið gegn samþykkt þessari. Einnig er heimilt að afturkalla leyfi telji bæjarstjórn það nauðsynlegt í þágu hollustuhátta og öryggis. Jafnframt getur bæjarstjórn, telji hún og héraðsdýralæknir brýna þörf á, bannað eða takmarkað hunda- og kattahald í dreifbýli sveitarfélagsins.

Ef skráður umráðamaður hunda og katta vanrækir skyldur sínar eða brýtur ítrekað eða alvarlega gegn ákvæðum samþykktar þessarar eða öðrum reglum sem gilda um hunda- og kattahald getur heilbrigðisnefnd bannað viðkomandi að halda gæludýrið og látið fjarlægja dýrið.

Skráðum umráðamanni dýrs er skylt að greiða kostnað sem leiðir af brotum á samþykkt þessari.

20. gr.

Viðurlög og kærueimild.

Um viðurlög vegna brota á samþykkt þessari fer samkvæmt ákvæðum laga nr. 7/1998, um hollustuhætti og mengunarvarnir. Brot gegn samþykkt þessari varða sektum, rúmist þau jafnframt innan refsíákvæða hlutaðeigandi laga, nema þyngri refsing liggja við samkvæmt öðrum lögum. Skulu þau brot sæta þeirri málsmeðferð sem boðin er í lögum nr. 88/2008, um meðferð sakamála.

Um kærueimildir fer samkvæmt lögum nr. 7/1998, um hollustuhætti og mengunarvarnir.

21. gr.

Gildistaka.

Samþykkt þessi sem samin er af heilbrigðisnefnd Austurlandssvæðis og samþykkt af bæjarstjórn Fjarðabyggðar, staðfestist hér með skv. 59. gr. laga nr. 7/1998 um hollustuhætti og mengunarvarnir og öðlast gildi þegar við birtingu. Frá sama tíma fellur úr gildi samþykkt nr. 191/2019 um hunda- og kattahald í Fjarðabyggð.

Umhverfis-, orku- og loftslagsráðuneytinu, 17. ágúst 2022.

F. h. r.

Sigurbjörg Sæmundsdóttir.

Trausti Ágúst Hermannsson.